



KOMUNIKADU IMPRENSA

Submisaun ba Komisaun B Parlamentu Nasional kona-ba Proposta Lei Orsamentu Jeral Estadu 2026 ba Polícia Nacional de Timor-Leste

Data: 17 Novembru 2025

Introdusaun

ONG HABADA hanesan organizasaun sosiedade sivil ne'ebe dedika-an ba monitorizasaun no advokasia ba seguransa komunitária no governasaun polisia nian, ohin fó sai ami nia análise detalladu kona-ba proposta Orsamentu Jeral Estadu (OJE) ba tinan 2026, relasiona ho Polícia Nacional de Timor-Leste (PNTL). Análize, bazeia ba dadus ofisial sira, identifika pontu forte sira iha transparénsia maibe alerta kona-ba dezekilíbbriu estruktural kritical sira ne'ebe bele kompromete efikásia operacional polisia nian iha tempu naruk.

Proposta orsamentu ba PNTL iha tinan 2026 hamutuk US\$49.511.296. Maski montante ida-ne'e hatudu kompromisu Estadu nian ba instituisaun ne'e, maibe ninia estruktura hatudu vulnerabilidade signifikaativa tebes: iha ne'ebe 88,2% hosi total (US\$43,695,119) aloka de'it ba Saláriu no Vensimentu sira no restu 11.8% ba nesesidade operacional no investimentu sira seluk.

Forsa polisia modernu ida labele funsiona de'it hanesan "mákina selu saláriu nian", maibe importante tebes aseguara katak PNTL iha rekursu nesesáriu sira hodi funsiona ho efetivu – ne'ebe inklui kombustível, manutensaun veikulu, ekipamentu espesializadu, teknolojia, no formasaun ho kualidade. Dezekilíbbriu fiskal atual fó perigu ba sustentabilidade operacional polisia nian.

Pontu Forte sira: Transparénsia no Foku Estratéjiku

HABADA rekoñese aspetu pozitivu iha proposta orsamentu, estruktura ne'e klaru no detallu, hodi permite kontrolu ne'ebe efetivu ba gastu sira tuir unidade no programa organizasaun nian. Foku maka'as iha Programa 366 - Seguransa Nasional (dolar amerikanu millaun 46,2) hatudu aliñamentu klaru ho misaun konstitusional PNTL nian. Inkluzau hosi rubrika espesífiku sira ba "Kapital Menor" iha unidade sira hanesan Unidade Espesial Polisia nian nomós hanesan sinal pozitivu ida hosi rekoñesimentu ba nesesidade investimentu nian iha ekipamentu sira.

Dezafiu Krítiku sira: Ezekusaun Ki'ik no Kapasidade Operasional Limitadu

ONG HABADA nia análise ba proposta OJE 2026 no ezamina ezekusaun orsamentu 2025 (dadus to'o 13 Novembru). Rezultadu sira ne'e hatudu no preokupante:

- Taxa ezekusaun global OJE PNTL 2025 nian maka 78.8%, ne'ebe taka realidade sira ne'ebe diferente tebes.
- Unidade krítiku sira nia taxa ezekusaun ne'ebe ki'ik tebes: Unidade Marítima (69.2%), Komandu Operasional Nasional (66.6%) no Rejiaun II (57.4%) maka ezemplu sira ne'ebe klaru.
- Númeru sira ne'e indika problema sira ne'ebe kle'an, hanesan planeamentu ne'ebe la realistiku, prosesu aprovizionamentu burokrátiku sira, ka falta kapasidade jestaun nian. Konsekuénsia direta maka redus kapasidade operasional sira: menus patrullamentu marítimu, fronteira, no nasional, nune'e halo nasaun ne'e sai vulnerável liu ba atividade ilegal ka kriminal sira.

ONG HABADA fó avizu katak replika de'it alokasaun sira ba unidade sira-ne'e la-ho rezolve kauza subjasente sira hosi nivel dezempeñu ne'ebe ki'ik sei sai erru ida.

Rekomendasaun Xave sira ba OJE 2026 nian

Haree ba análise ida-ne'e, ONG HABADA hato'o rekomendasaun urjente sira tuirmai ba autoridade competente sira, inklui Parlamentu Nasional no Governu ne'ebe daudaun ne'e diskute hela iha faze espesialidade, ba aprovasaun final ba OJE 2026 PNTL nian:

1. **Revizaun ba Enkuadramentu Finanseiru Jeral:** Tenki konsidera revizaun pozitivu ida ba orsamentu total PNTL nian ba tinan 2026, ho objetivu espesífiku atu aumenta montante absoluta ne'ebe aloka ba "Bens no Servisu sira" no "Akizisaun Kapital sira", hodi la afeta saláriu sira. Ida-ne'e sei permite atu halo balansu persentajen ida la-ho hamenus saláriu.
2. **Optimizasaun ba Alokasaun Pesoal:** Enkuantu saláriu sira tenke mantein, importante tebes atu hala'o estudu ida hodi asegura katak saláriu aplika ho efisiénsia másimu, hodi garante katak estrutura kareira no pesoal nian aliña ho nesesidade polísia nian loloos.
3. **Orsamentu Bazeia ba Rezultadu:** Proposta OJE 2026 tenke hametin ligasaun entre finansiamentu no rezultadu sira ne'ebe hein. Programa no atividade ida-idak tenke iha objetivu sira ne'ebe bele sukat no define ho klaru (ezemplu, hamenus crime nian ho X%, aumenta apreensaun sira iha fronteira ho Y%). Orsamentu tenke justifika bazeia ba atinjimentu objetivu sira-ne'e.
4. **Planu Asaun ba Unidade sira ho Dezempeñu Ki'ik:** Ba unidade sira ho dezempeñu ki'ik iha 2025 (Marítima, Rejiaun II no III), proposta 2026 nian tenke akompaña ho planu asaun koretivu ida. Planu ida-ne'e tenke identifika kauza sira hosi dezempeñu ne'ebe ki'ik no estabelese meta sira ne'ebe klaru ba ninia rezolusaun.

5. **Hametin Unidade Operasional sira:** Alokasaun sira ba Unidade Marítima, Patrullamentu Fronteira, no Unidade Especial presiza aumenta, konsidera sira-nia kustu operacional intrínseku no sira-nia papel krítiku iha seguransa nasional. Investimentu iha mobilidade, komunikasaun seguru, no ekipamentu vijilánsia tenke sai prioridade ida.
6. **Kriasaun Liña Orsamentu ida ba Investimentu iha Teknolojia:** Tenke fó konsiderasaun atu kria liña orsamentu espesífiku ida, ka hametin hirak ne'ebe iha ona, ba investimentu iha teknolojia polísia nian (Sistema Informasaun, vijilánsia vídeo, ekipamentu forense), ne'ebe fundamental ba forsa polísia modernu ida.
7. **Hametin Kapasidade Jestaun Orsamentu:** Apoiu kontinua ba formasaun sira ne'ebe fornese ba jestor PNTL sira, partikularmente iha nivel unidade descentralizadu, hodi hadi'ak planeamentu finanseiru, ezekusaun, no relatóriu.

Konkluzau

OJE 2026 hanesan oportunidade krítiku ida hodi transforma PNTL sai forsa ida ne'ebe ágil liu, ekipadu no bele hatan ba dezafiu kompleksu sira seguransa nian iha sékulu XXI. Aproveita pontu forte sira transparénsia nian no ho aten-barani rezolve dezekilíbriu sira ne'ebe identifikadu sei kontribui ho desizivu ba alokasaun rekursu sira ne'ebe efisiente no efikas, hametin kapasidade PNTL nian hodi servi no proteje sidadaun sira Timor-Leste nian.

ONG HABADA sei kontinua monitoriza prosesu orsamental no halo advokasia ba jestaun seguransa públika ne'ebe transparente, efisiente, no foka ba comunidade.

Ba informasaun kle'an bele kontaktu:

Abel Amaral

Diretor Ezekutivu

Rua: Tali Laran 1, Comoro, Dom Aleixo, Dili

Email: abelamaral75@gmail.com

Telefone: +670 7745 4324

Website: www.habada.org